

Svjetska Banka odobrila novi projekat modernizacije sektora Zemljišne administracije u Federaciji BiH

22.05.2024 09:04



Federacija BiH ima namjeru modernizirati i unaprijediti tačnost i dostupnost podataka u sektoru Zemljišne administracije, a putem Projekta geoprostorne infrastrukture i procjene vrijednosti nekretnina (Geospatial Infrastructure and Valuation Enhancement, GIVE project). Za potrebe implementacije projekta kojim će upravljati Federalna uprava za geodetske i imovinsko-pravne poslove, 15.05.2024. godine je od odbora izvršnih direktora Svjetske Banke odobren zajam ukupnog iznosa 23,1 miliona eura.

Svrha projekta GIVE je prevazilaženje ključnih izazova u Zemljišnoj administraciji u Federaciji BiH, a tri su mu glavna cilja:

1. Unapređenje infrastrukture za geoprostorne podatke (IPP FBiH, <https://ippfbih.gov.ba/>),
2. Ažuriranje podataka katastra i zemljišne knjige u Federaciji BiH,
3. Prikupljanje podataka o nekretninama i razrada metodologije za uspostavu sistema masovnog vrijednovanja nekretnina.

Projektom će se povećati interoperabilnost ključnih skupova geoprostornih podataka kao i usaglašavanje registara zemljišne administracije (katastar i zemljišna knjiga), što će doprinijeti unapređenju poslovnog ambijenta, donošenju politika prostornog planiranja zasnovanih na podacima, te unapređenju procjene seizmičkih i klimatskih rizika – što je sve suštinski važno za izgradnju održivije i bolje budućnosti za sve stanovnike u Bosni i Hercegovini.

Jačanjem saradnje između ministarstava i institucija na lokalnom, kantonalnom i entitetskom nivou, GIVE projekat će se usmjeriti i na poboljšanje procesa donošenja odluka. To će se ostvariti putem bolje dostupnosti podataka te inicijativa za izgradnju kapaciteta koje mogu pomoći u optimalizaciji pružanja javnih usluga, unapređenju upravljanja katastrofama i pružanju informacija za prostorno planiranje u cijeloj FBiH.

Projekat je u najvećoj mjeri usklađen sa strategijom Svjetske banke za Bosnu i Hercegovinu, usmjerrenom na povećanje rasta privatnog sektora i unapređenje pružanja javnih usluga. Nadovezuje se i na Program ekonomskih reformi zemlje i pruža podršku usklađivanju s politikama i propisima EU.